

Sanhgyangh:

Siuqnyib Hezvei Dungcuz Bang Duetgungz

Ndwen 6 ngoenz 11, Sanhgyangh Dungcuz Swciyen Siuqnyib Hezvei Dungcuz youq Gujyiz Cin Nanzcan segih laebbaenz venjbaiz, baenz bak boux mehmbwk dajsiuq angqyangz doxcomz, langhbaiz dinfwngz siuqnyib、ngonz huqsiuq、diuqfoux dohyeh, angqhoh hezvei laebbaenz. Geij bi neix, Sanhgyangh roengzrengz cau aen bingzdaiz hwngfat gij canjnieb siuqnyib comz beizyin、gyaulouz、siugai baenz aen cingjdaej ndeu haenx, yungh aen vunqsik “hezvei + gunghsw + dieggoek + mehsiuq + dinghdan”, dazyinx engq lai senj dieg banggungz buensenj mehmbwk youq ranz lingzvued couhnieb, saedyienh “gwnz laeuz swnghhoz, laj laeuz couhnieb”, vih buekguh duet gungz ok faenh rengz ndeu.

(Gungh Bujgangh/龚普康 Yangz Siuh/杨肖)

► Song boux mehmbwk rox siuqnyib caez hag dinfwngz ndei.



Namzningz: Son Fwenliuzloz Cienz “Vwnzva Doj”

Ndwen 6 ngoenz 12, Namzningz Si Liengzging Gih Nanzauj Cungsim Yozyau “Son ciengq Fwenliuzloz, Cienzyiengz ‘Vwnzva Doj’ ” Yenzdaujvei Youq Namzningz hai.

Gaenh bi daeuj, vih engq ndei henhoh swncienz fwenliuzloz gij “vwnzva doj” Boux-cuengh neix, Nanzauj Cungsim Yozyau haiguh gij hong “Fwenliuzloz haeuj hagdanz”, hawj hagseng haenggyaez eu fwenliuzloz, caemhcai comz baenz aen “Yaujyingh Yisuz-donz” he, cienmonz yienjciengq fwenliuzloz, sawj fwenliuzloz Bouxcuengh ndaej swncienz roengzbae.

(Cungh Hihcwngh/钟希增 Veiz Cwnghsau/韦增绍)



▲ Gak boux conghyah lauxsae youq yenzdaujvei hab'ingj louzniemh.



▲ Mehmbwk Vanzgyangh riuvauvau dwk sou haeuxcid.

Vanzgyangh: Haeuxcid Homfwd Ndaej Guekgya Nyinhcingq

Seizneix, Cunghvaz Yinzminz Gunghozgoz Nungzyez Nungzcunh Bu fatbough daih 290 hauh gunghgau, Vanzgyangh haeuxcidhom ndaej daengz Cunghvaz Yinzminz Gunghozgoz nungzcanjbij deihleix biugeiq daengheiq cwngsuh, ndaej lied haeuj aen hangzlied baujhoh gij deihleix geiqhauh nungzcanjbij guek raeuz bae. Neix dwg cawz Vanzgyangh makbug simhoengz、Vanzgyangh haeuxsuenhom Vanzgyangh makmoizheu, youh miz daegsaek nungzcanjbij aeundaej guekgya nungzcanjbij deihleix geiqhauh canjbij yiengh miznaj neix. Daengz ndwen 4 ngoenz 30, Vanzgyangh gungh ndaej daengz “sam binj it biu” nyinhcingq caemhcai youq ndaw geizhanh mizyauq haenx miz 28 aen nungzcanjbij.

(Couh Liz/邹立 Hoz Suilingz/何瑞玲)

Ginhsiu: Daeuj Mbanjyauz Ganj Haw Lo!



▲ Mehmbwk Yauzcuz dawz gij byaek miz daegsaek haenx hawj hekyouz gwn.

Ndwen 6 ngoenz 13, Ginhsiu Yauzcuz Swciyen bi 2020 ngoenz vwnzva caeuq swyenz yizcanj —— “hawciengz feihyiz” youq Lozyangh Yangh Hwngz-cunh Mbanjyauz haihaw, cawjdaez dwg “cienzswnj feihyiz, ndangcangq saedceij”, baih cawjbanh iucingj 10 boux bouxcienzciep Ywyauz, langhbaiz cimqyw、cimcit daengj 10 cungj dinfwngz. Ndaw Mbanjyauz bouxboux cungj daeuj langhbaiz dinfwngz maenhndei bonjfaenh, guh gyong namhhenj、daeuhfouh mbaw-faex、cuk ceiz daengj, hozdung lai cungj lai yiengh, hekyouz angq dwk yinx dangqmaz.

(Bangz Yaujvaz/庞晓华 Cinz Yen/覃艳 Loz Veijcaiz/罗伟才)